

Nos

HENDERMAN

Special

Pa: Mercedes Abdul

Eduardo de Veer: Un persona cu empuhe

EL A LOGRA DI RESCATA E PATRIMONIO FAMILIAR DEN MOMENTONAN DIFICIL

DIARIO tin como invitado awe den su espacio "Nos Henderman Special" señor Eduardo de Veer, Presidente di Meta Corporation, kende na aña 1964 a logra di rescata e patrimonio familiar di momentonan difcil.

De Veer ta relata con su welo, don Eddy de Veer, a crea un patrimonio di "tres pia", cual ta encera un cadena di cine, Tropical Bottling y e compania di transportacion "E. de Veer Transport" (awe ATCO).

Debi cu e historia aki ta basta amplio y interesante, e relato ta worde treci den dos fase. E di dos ta encera con Meta Corporation a nace y crece, y loke e ta nifica pa Aruba riba tereno turistico y como proveedor di trabao.

ESTUDIO Y TRABAO:

Prome dia cu Eduardo de Veer a bishita school tabata Eerste Klas na Juliana School (awendia Reina Beatrix School), unda el a studia te 6de klas y despues el a bay Merca, na Academia Militar di New York, unda cu el a caba su high school.

"Despues di high school na New York Military Academy cu tabata un parti masha importante di mi formacion, mi a bay Universidad di Miami pa sigui estudio di Administracion di Negoshi obteniendo un "Bachelor Degrees" pa especializacion riba Administracion Financiero. Na aña 1964 mi a gradua y bin bek na Aruba".

E prome trabao cu Eduardo de Veer a haci tabata cu cinenan unda el a pasa den tur su fasenan, pues, siña pasa pelicula como proyeccionista, colecta y vende ticket, programa pelicula, etc. Na dado momento el a worde encarga cu e gerencia di e cinenan (mas of menos ocho) cu tabata perdiendo placa.

Eduardo de Veer su tarea tabata di reorganiza e teatronan y pone nan riba pia.

"Nos a haci diferente modificacion den e organizacion di cinenan pa trece mas eficiencia, ofrece un ambiente mas atractivo, y a logra "build up" e negoshi bek te di manera cu esaki a bolbe produci ganashi.

Varios cine a worde cera y e otronan a ser remodela door di pone aire acondiciona, cambia stul di palo pa asientonan fura, etc. Poco aña despues nos a traha drive inn", de Veer ta comenta.

UN PATRIMONIO DI

"TRES PIA": Famia de Veer



nan patrimonio a pasa di un pa otro generacion, y bayendo bek den historia don Eduardo de Veer ta relata con su welo a funda un patrimonio di "tres pia".

CADENA DI CINE: PIEDRA PA PIEDRA: "Na december 1920, esta, 76 aña pasa mi welo a cuminsa cu un teatro. Como cu e no tabata tin placa pa compra e machinenan el a cambia un pianola, cu e cu mi wela a haya como regalo di casamento, pa e proyectoman". Eddy de Veer a traha un teatro di palo na aire liber, riba un tereno habri banda di e cas di docter Eloy Arends na Wilhelminastraat. "Eynan el a "set op" un cine cu tabata simplemente un pantaya, un cura cera cu zing rond, unda cu e publico tabata trece nan propio stul for di cas.

"Prijs di entrada tabata 10 cent pa persona y tin biaha 10 cent pa dos persona, y nan tabata genera electricidad via un auto. Asina a cuminsa cu cine mudo 76 aña pasa".

Poco poco e negoshi a bay mejorando y otro teatronan a bin acerca. e.o Teatro Gloria y Teatro Cinelandia cu tabata construi di mader.

Despues cu Lago a habri su portanan treciendo un progreso inmenso, hunto cu e crecimiento di Aruba su economia e negoshi di de Veer a crece tambe.

"Despues un grupo encabesa pa Arturo (Tuyo) Arends a traha e Teatro Rialto cu despues mi welo a compra for di nan, y asina e cadena di cine a bay cre-

ciendo".

Pelicula cu sonido a pone interes di publico pa cine crece ainda mas, y señor Eddy de Veer a logra di lanta un teatro practicamente na cada barrio di Aruba.

San Nicolas tabata tin Rex cu a bira Teatro principal, y tambe Cinelandia. Lago Heights y Esso Club no a keda atras a bin cu su teatronan, mientras cu por corda di Teatro Aurora na Santa Cruz. Savaneta tambe a haya di dje.

De Veer ta menciona cu durante e segundo guera mundial tabata tin como 11 teatro na Aruba.

Pero bida na Aruba a evolucionar pareu cu entrada di tecnologia moderno; nos comunidad a cera conoci cu satellite dish; aparatonan di video a subi mercado loke a converti e gusto pa mira pelicula den un diversion domestico. Centronan di video a habri porta na granel, y asina mas amante di cine a sigui keda cas.

E cadena di teatro di famia de Veer a cuminsa desaparece poco poco; distribuidornan di cine no a logra haya pedido pa pelicula nobo, y asina periodicamente e teatronan e cuminsa cera nan porta, excepto e drive-inn cu te ainda ta existi.

COCA COLA: "Na aña 1949 mi welo a compra for di señor Vic Pinedo (tata) di Curacao, e planta chiquito di Coca Cola cu tabata tin na Aruba, cual industria a sigui funciona durante tur e añanan aki y awendia ta e Tropical Bottling cu nos tur conoce".

E. DE VEER TRANSPORT:

"Despues cu Lago a establece na Aruba mi welo a haya un contrato for di e compania aki pa transporta su mercaderianan for di waf pa Lago y esey ta e negoshi cu a cuminsa bao e nomber di E. de Veer Transport, y cu nos ta yama awendia -ATCO-. Esaki tabata e tres pianan cu mi welo a funda".

Asina don Eddy de Veer a mira su negoshinan florece cu ayudo di su ruman Hilda y su yiu Gerard (tata di don Eduardo).

1964— EPOCA DIFICIL: Prome cu Eduardo de Veer a bolbe for di Merca, e patrimonio familiar tabata pasando den momentonan difcil.

"E compania a pasa door di un epoca difcil, debi cu e no a worde moderniza. Na aña 1964 ora cu mi a bin bek despues di a caba mi estudio, mi a haya aki cu e cinenan y e negoshi di transportacion di Lago tabata perde placa mientras cu Tropical Bottling apenas tabata cubri su gastonan.

Di hecho e compania tabata falliet. Banconan tabata wante un tiki na bida pero su dianan tabata conta, y no a kedami nada otro

cu purba di trece saneamento". Poco poco e situacion a drecha y despues di algun aña e compania a produci resultadonan positivo tanto pa e cinenan como pa e negoshi di transportacion. E planta di refresco tambe a conoce un par di aña di saneamento, mientras cu su maneho a pasa na man di un gerente. Asina e empresa aki tambe a sigui bay dilanti.

ASSOCIATED TRANSPORT CO.: Na momento cu Aruba a cuminsa ricibi container di carga envez di cargamentonan los, a bira necesario pa amplia e facilidatnan na un manera mas especializa.

Asina ATCO a nace.

"Nos a cuminsa cu pone equiponan di nos compania di transportacion disponible, nos a keda amplia nos equipo pa duna servicio na e companianan di vapor y eventualmente nos a specializa nos mes como un empresa di carga y descarga barco cu equiponan moderno, grua, machinenan pa pone container uno riba otro, trucknan pa transporta, etc".

E compania a cambia su nomber pa "Associated Transport Co" (ATCO) cual a expande y a tumar over un compania similar na Curacao. A presta servicio tambe pa "Bonair Petroleo" di Bonaire, y durante mas of menos 5 aña a establece un filial na Puerto La Guaira, Venezuela.

E tempo ey carga tabata worde transporta for di Merca pa Venezuela via Aruba-Punto Fijo y for di aki pa nan destinacionnan respectivo.

"Den e transcurso di añanan e negoshi di carga y descarga barco na Curacao y Aruba a worde consolida bao di un grupo di agente cu na Aruba yama ASTEC y na Curacao CPS. Nos a converti nos actividad den un sociedad caminda cu nos tin un porcentaje di accionnan den e compania ey", Eduardo de Veer ta indica.